

INUIT ATAQATIGIIT

Inatsisartuni



August 2020

UKA2020/130

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Atorfinni toqqaannartumik pisortat suliariumannittussarsiuussineranni suliassanik agguaanernik kiisalu isumalluutininik atuinissamik akuersissutinik agguaassinernik suliaqarfiusuni immikkut tatigisaallutik atorfilinnik nutaamik atorfinitsitsinermut atatillugu atorfinitsitsinermi piumasaqaatinik atulersitsinerup pitsaaqutaanik pitsaanngequtaanillu qulaajaaviusumik kingusinnerpaamik UKA2021-mi Naalakkersuisut nassuiaasiornissaat pillugu Inatsisartut aalajangiiffigisassatut siunnersuut. Nassuiaammi minnerpaamik pissutsit ilanngussaq 1-mi taaneqartut qulaajaavigneqassapput.

(Inatsisartunut ilaasortaq Múte Bourup Egede, Inuit Ataqatigiit)

Tunngavilersuut:

Pisortani atorfinni immikkut pingaarutilinni pisortat tamanut suliariumannittussarsiuussineranni suliassanik agguaassisarnerni inuiaqatigiillu isumalluutaasa iluaqutigineqarnerannut akuersissutini toqqaannartumik sunniuteqarfiusuni akusussaaffiit annertupput. Taamatut akisussaaffeqarnermi sulianut ingerlatanut soqutigisatigut aporaaffeqaanginnissaq tatiginartumillu sulianik ingerlatsinissaq naatsorsuutigineqartarput.

Qaffasissumik atorfeqarnermi inuk pisortani, aammalumi immikkoortuni allani amerlasuuni periutsinut, suleriaatsinut malitassianullu annertuumik ilisimasaqalersarpoq. Taassuma saniatigut politikerit atorfillillu suleqatigisalluunniit aamma tamakkerlugit ilisarimaneeqalersarput.

Taamaammat inuup immikkut tatigisaalluni atorfeqartinneqartup pisortani sulinerata nalaani, suliunnaareerneratalu kingorna pisuutinniarneqaanginnissaa pingaarutreqarpoq. Siunnersuuteqartutut inuit immikkut tatigisaallutik atorfeqartinneqartut sulisitsisuminnut unneqaarinnissaat tunniusimanissaallu upperaara.

Ullumikkulli imaaliallaannarluni ‘illuata tungaanut’ toqqaannartumik nuuttoqarsinnaanera oqaatigisariaqarpara – tassa pisortani immikkut tatigisaalluni atorfeqarsimanermit namminersortunngorluni, namminersortuni sulisunngorluni suliarisimasat iluanni pisortanut nioqqutissanik sullissinernilluunniit tuniniaasunngorluni, imaluunniit atorfeqarsimanerup nalaani suliffeqarfimmik isumaqatiginninniarfigisimasamut pisortaaninngorluni. Ila sorpassuit taakkartorneqarsinnaapput. Taamaaliorneq arajutsineqarsinnaanngitsumik soqutigisanik aporaatsitsisarpoq.

Taamatut pisoqartarsinnaanera pinngitsoortinniarlugu pisortani soqutigisat aporaateratarsinnaanerat pinngitsoortinniarlugu, minnerunngitsumillu erseqqissumik ingerlatsinissaq isumannaarniarlugu, inunnut immikkut tatigisaallutik atorfeqartinneqartunut piffissami aalajangersimasumi atuuttussamik atorfinnut allanut nuussinnaanngikkallarnissamik, aamma unammillerneq pillugu immikkut piumasaaqatitut ilisimaneqartunik, piumasaaqateqartalernissaq aaqqissunneqarsinnaavoq.

Siunnersuuteqartutut siunnersuutikkut, soorlu aningaasaqarnikkut, atorfeqartitsinermi inatsisinut tunngasunut il.il. kinguneqaataasinnaasut qulaajaavigineqarnissaat kissaatigaara, taamaalilluni saqqummiunneqartumut tunngasuni suliniutinik saqqummiussinissami pitsaanerpaamik toqqammavissiisoqarsinnaaqullugu. Mannalu pillugu torersumik oqallittoqarnissaa kissaatigaara.

Pisortanut aningaasaqarnikkut allaffissornikkullu kingunerisassai:

Nassuiaammik suliaqarneq AC-fuldmægtigip ukioq kaajallallugu sulineranik akeqassasoq ilimagineqarpoq, tassa 500.000 kr.

Namminersortunut aningaasaqarnikkut allaffissornikkullu kingunerisassai:

Soqanngilaq.

Innuttaasunut aningaasaqarnikkut allaffissornikkullu kingunerisassai:

Soqanngilaq.